

## Бугун Миллий кутубхонада “Муштум” журналининг 94 йиллигига бағишланган нашр ижодкорлари билан ижодий учрашув ўтказилади



14 март куни Алишер Навоий номидаги Ўзбекистон Миллий кутубхонасида “Муштум” журналининг 94 йиллиги муносабати билан журнал ижодкорлари билан “Ҳамон сафда, ҳамон ҳақгўй” деб номланган ижодий учрашув бўлиб ўтади. “Муштум” ҳажвий журнали 1-сони 1923 йил 18 февралда “Туркистон” газетасининг иловаси сифатида (3000 нусхада) чоп этилди. 1924 йилдан эса “Қизил Ўзбекистон” газетасининг нашри сифатида чоп этилган. Журналнинг 1-сонидан унинг ташкилотчиларидан бири А.Қодирийнинг “Муштум таърифида” бош мақоласи берилган. “Муштум”га турли йилларда ижод қилган Ғози Юнус, Чўлпон, Ҳожи Муин, Рафиқ Мўмин, Ғафур Ғулом, Комил Алиев, Абдулла Қаҳҳор, Носир Саид, Ғайратий, Собир Абдулла, Саид Аҳмад, Анвар Муқимов, Худойберди Тўхтабоев, Анвар Обиджон ва бошқа ижодкорлар ўз асарлари билан иштирок этганлар. “Муштум” журналида чоп этилган кўпгина ҳажвий асарлар адабиётимизнинг бебаҳо дурдоналарига айланган. Масалан, Ғ.Ғуломнинг “Шум бола” асари, А.Қаҳҳор ва С.Аҳмад ҳажвиялари, Э.Воҳидовнинг “Донишқишлоқ

хангомалари”, А.Ориповнинг “Жаннатга йўл” драмаси. Юзлаб танқидий мақолалар, фельетонлар жамиятни турли иллатлардан тозалашда “Муштум”нинг асосий қуроли ҳисобланган. Халол ва ошқора танқид жамият ва одамлар учун ҳақиқий малҳам бўлишига эришиш журналнинг бош мезони ҳисобланади. Журнал ўз фаолиятида турли ижодий шакллардан, жумладан Насриддин Афанди, Алдар Кўса каби халқ оғзаки ижодидаги образлардан кенг фойдаланади. Унинг саҳифаларида муҳим воқеаларга бағишланган фельетон, памфлет, ҳажвия, ўртоқлик ҳазиллари ва бошқа қизиқарли танқидий материаллар ёритилади. 1998 йил 28 августда журналнинг ҳафталик иловаси “Афанди” газетаси ташкил этилган. Газетада даврнинг долзарб муаммолари, танқидий мақолалар ҳам кенг ёритилади. “Муштум” ўз карикатуралари билан ҳам машҳур. Унинг биринчи рассоми Иштван Тулля бўлган, кейинчалик журналда турли йилларда Т.Муҳамедов, Д. Сеницкий, М. Воробейников, Н.Иброҳимов, А.Холиқов, С. Субҳонов, А.Қамбаров, С.Салоҳиддинов, Ҳ.Содиқов ва бошқалар ишлаган ва ишлаб келмоқдалар. “Муштум”га Ғози Юнус, Зиё Саид, Ғ.Ғафуров, Ҳусайн Шамс, Ж.Маҳмудов, М. Муҳамедов, Акмал Пўлат, З.Йўлдошев, Мирмуҳсин, Иброҳим Раҳим, Н. Аминов, Максуд Қориев ва бошқалар муҳаррирлик қилган.